

ՄԱՀԱԳՐԱԿԱՆ



ՆՈՐԻՆ ԱՍԵՆԱՊԱՏՈՒԹԻՒՆ ՏԵՐ ՄԵՍՐՈՂ ԱՐՔ. ՍՈՒԹԱՖԵԱՆ
ԿՈՍՏԱՆԴՆՈՒՊՈԼԻՍԻ ՀԱՅՈՑ ՊԱՏՐԻԱՐՔ

Մարտի 8-ին Կոստանդնուպոլսի Սուրբ Փրկիչ Ազգային հիանդանոցում երկարատև հիանդութիւնից յետոյ ի Տէր հանգաւ Կ. Պոլսի Հայոց Պատրիարք Ն.Ա.Տ. Մեսրոպ արք. Մութաֆեանը:

Մեսրոպ Պատրիարքը վերջին տարիներին տառապում էր ծանր, անբուժելի հիւանդութեամբ եւ գտնուում էր Կ. Պոլսի Սուրբ Փրկիչ Ազգային հիանդանոցում:

Ամենայն Հայոց Կաթողիկոս Ն.Ս.Օ.Տ.Տ. Գարեգին Բ. եւ Մայր Աթոռ Սուրբ Էջմիածնի միաբանութիւնը, Գերագոյն հոգեւոր խորհրդի անդամները եւ ողջ հոգեւոր դասը սգում են Կոստանդնուպոլսի Հայոց Պատրիարքի մահը եւ վշտակցում Կոստանդնուպոլսի Հայոց Պատրիարքութեան հոգեւոր դասին ու պոլսահայութեանը՝ աղօթելով Երջանկայիշատակ Մեսրոպ Պատրիարքի հոգու հանգստութեան եւ խաղաղութեան համար:

Յիշատակն արդարոյն օրհնութեամբ եղիցի:

ԿԵՆՍԱԳՐԱԿԱՆ

Ամենապատիւ Տէր Մեսրոպ արքեպիսկոպոս Մուկաֆեանը ծնունել է Ստամբուլում՝ 1956 թ. յունիսի 16-ին:

1963–1968 թթ. ուսանել է Թաքսիմի Եսայեան նախակրթարանում:

1968–1973 թթ. սովորել է Նշանթաշի Անգլիական վարժարանում:

1973–1975 թթ. կրթութիւնը շարունակել է Ամերիկեան Բարձրագոյն վարժարանում (Շտուտգարդ, Գերմանիա):

1975–1979 թթ. Մեմֆիսի համալսարանում (ԱՄՆ) ուսանել է «Ընկերաբանութիւն եւ իմաստասիրութիւն», 1977–1979 թթ. Մեմֆիսի մասնաճիւղ Սէուլընի Անգլիկան ուսումնարանում հետեւել է «Աստուածաբանութիւն» դասընթացի:

1977 թ. յուլիսի 19-ին արժանացել է սարկաւազական ձեռնադրութեան՝ ձեռամբ Գերաշնորհ Տ. Շահան եպս. Սուաճեանի:

1979 թ. մայիսի 13-ին Ն.Ա.Տ. Շնորհք Պատրիարքի կողմից ձեռնադրուել է կուսակրօն քահանայ՝ Բէյոզլուի Ս. Երրորդութիւն եկեղեցում:

1979–1982 թթ. ուսանել է Երուսաղէմի Եբրայական համալսարանում (Իսրայէլ)՝ ստանալով Հին Կտակարանի պատմութեան եւ գրականութեան մագիստրոսի աստիճան, ապա Երուսաղէմի համալսարան քոլեջում՝ ստանալով Սուրբգրային հնագիտութեան մագիստրոսի աստիճան:

1979–1980 թթ. Երուսաղէմի ընծայարանում դասաւանդել է անգլերէն եւ Հին Կտակարան:

1982–1983 թթ. ծառայել է որպէս Ն.Ա.Տ. Շնորհք Պատրիարքի քարտուղար:

1983 թ. մայիս 7-ին պաշտպանել է «Սուրբ Գիրք եւ Աւանդութիւն» վերտառութեամբ աւարտաճառը եւ արժանացել մասնաւոր վարդապետութեան աստիճանի:

1983 թ. յունիս 6-ից եղել է Պատրիարքարանի դիւանապետ, Կրօնական ժողովի եւ Խորհրդակցական մարմնի անդամ:

1983–1984 թթ. զինուորական ծառայութիւն է իրականացրել Պուրտուր է. Գնդապետական հրամանատարութիւնում:

1986 թ. մայիսի 3-ին պաշտպանել է «Նահապետաց կրօնը նախքան եգիպտական գերութիւնը» աւարտաճառը՝ ստանալով ծայրագոյն վարդապետութեան աստիճան:

1986 թ. սեպտեմբերի 21-ին Մայր Աթոռ Ս. Էջմիածնում ձեռամբ Ն.Ս.Օ.Տ.Տ. Վազգէն Ա. Ամենայն Հայոց Կաթողիկոսի ստացել է եպիսկոպոսական ձեռնադրութիւն եւ օծում:

1988–1989 թթ. ուսանել է Հռոմի Ս. Թովմա Աքրօինացու համալսարանում՝ ստանալով Միջեկեղեցական ու միջկրօնական յարաբերութիւնների աստուածաբանութեան մագիստրոսի աստիճան:

1988 թ. յուլիսի 1-ին Շնորհք Պատրիարքի կողմից նշանակուել է Կղզեաց տեսուչ:

1990 թ. մարտ – 1990 թ. սեպտեմբեր եղել է Կրօնական Ժողովի ատենապետ:

1990 թ. նոյեմբերի 6-ին Ն.Ա.Տ. Գարեգին Բ. Պատրիարքի կողմից նշանակուել է միջեկեղեցական գործերով պատրիարքական փոխանորդ:

1991–1997 թթ. եղել է Քահանայական լսարանի տեսուչ:

1991–1997 թթ. եղել է Ն.Ա.Տ. Գարեգին Բ. Պատրիարքի խորհրդակցական մարմնի փոխատենապետ:

1992 թ. դեկտեմբերի 5-ին Ն.Ս.Օ.Տ.Տ Վազգէն Ա. Ամենայն Հայոց Կաթողիկոսը շնորհել է արքութեան պատիւ:

1996 յունիսին նշանակուել է Պատրիարքական Աթոռի «Շողակաթ» բանասիրական հանդէսի խմբագրապետ:

1997 թ. հոկտեմբերի 27-ին Ն.Ա.Տ. Գարեգին Բ. Պատրիարքի կողմից նշանակուել է Պատրիարքական ընդհանուր փոխանորդ, Ն.Ա.Տ. Գարեգին Բ. Պատրիարքի վախճանից յետոյ՝ Պատրիարքական ընդհանուր փոխանորդ, ապա Պատրիարքական տեղապահ:

1998 թ. հոկտեմբերի 14-ին Պատգամաւորական Ժողովի կողմից ընտրուել է Կոստանդնուպոլսի Հայոց 84-րդ Պատրիարք:

Արժանացել է մի շարք պատուոյ տիտղոսների ու մրցանակների, անդամակցել տարբեր միութիւնների:

